

**Təntən sagı tə,  
Zwan  
nə púpúní  
Zwan təntən sagı tə yuu wa  
sugv**

*Lìu tə, v nə púpúní sagı kv tə*

Lìa zənzən buŋa də, kv yi \*tuntunv Zwan nə púpúní kv. Mə v mù Zwan təntə tətə nə púpúní Zwezi-\*Kərisə suywáŋú tə.

*Lìa tə nə, Zwan nə púpúní*

Zwan púpúní sagı kv tə v pa \*Kərisə lià púlé tə nə, ba nə gugurə tə də kunkun kàrà.

*Sagı tə wa sugv*

Yìèn yà zva \*Kərisə lià púlé tə wa. Kərisə lià púlí tə wa lià duən yà gıgarı Kərisə lià duən ba đuga. Ba yà kàrì kunkun kàrà Zwezi yuu wa, də nətɔ liù nə mɛ, sə v ya Kərisə liù yuu wa.

Zwan pìà v bırı ba də, Zwezi-Kərisə yi ləzwəne cígá cígá. U yi Yu tə, v nə wulə mu wa, biú. Yu yi poni, Yu yi sonu. Nə twá də Zwezi də Yu-\*Siŋu tə nə, nə ma yəé kv nətɔ tə. U mù nə sɪn nə cuna tə mama v lı. Cígá cígá Kərisə liù yi liù tə, v nə twá kàrà tə nə, ba nə bırı wá kv juɔ mama, ndə kv nə mɛ nətɔ. Zwezi-Kərisə ti v mu, v ma lárí lià tə duən yuu nə. Kv nətɔ dān bırı də, v swə Yu v ga yəé Yu də. Cígá cígá Kərisə liù də dān mɛ, sə v ti v mu tə, v ma lárí v duən Kərisə lià tə yuu nə.

*Zwezi yi mu sugu*  
*(Zwan 1.1-14; 1 Zwan 5.11-13)*

<sup>1</sup> Nə cugu liù kori. Nə ni wá də nə yía. Nə balu wá zəni. Nə dwen u yira də nə jìàn. U mù nə yi liù tə, u nə yin lá, ku jjuv mama. Ku liù təntə nə yi sugu tə, ku pin mu lià nə. <sup>2</sup> Liù tə, u nə yi mu, biri u tiàn nəba. Yá nə mù ni wá. Mə u yoo nə nə dān swìn, nə biri aba. Nə swìn u mù liù təntə yoo á con. U mù nə yi mu tə, ku nə ba zwèe Yu con. U mù yà nə yin də nə nyina Yu tə. U mù liù tə u nə biri u tiàn nəba, <sup>3</sup> nə ni wá, nə ga ni u kori. U mù yoo nə, nə swìn á də con, sə á də ja nimarv də nəba. Nə də con nə, nə də jə \*nimarv də nyina Yu, u də u biú Zwezi-\*Kərisə. <sup>4</sup> Tə yìèn tə yi, nə púpúní tə á nə, sə ku pa nə pupwən tə sú.

*Á yana poni lià*  
*(Efəzə tiàn 5.8-14; Titə 2.14)*

<sup>5</sup> Á nəjə sugu tə, nə nə ni u con, yá nə dān ga pià nə swìn ku nə biri aba. Sugu təntə nə yi: Yu yi poni Yu. Yá yikunu təlè u con. <sup>6</sup> Nə nə swìn də, nə jə \*nimarv də Yu, yá nə ga tuja yikunu wa yìèn, nə yi kunkuna, nə ga ba cígá tə nii nə twá. <sup>7</sup> Yu yi poni Yu. Yá nə nə yi poni lià ndə u nə, nə wá ja nimarv duən pwərə wa. Yá Yu biú Zwezi jana tə, tə nə nan u tiàn tə májǎ wa, dān wá sin nə cuna tə mama, tə li.

<sup>8</sup> Nə nə swìn də, nə ba cuna tuja, nə yi nə gıgarı nə tiàn, cígá ga təlè də nəba. <sup>9</sup> Nə nə swìn nə biri də, nə fwa cuna, Yu wá sèe u kwen tə cuna tə, nə mù də wá pwərə wa. Yá u ga wá sin nə kunkun yìèn tə mama. Yu wá fwa ku, u

yoo nə yi pùé nədɔ tíú, ɔ ga yi cígá tíú tə yiri.  
<sup>10</sup> Yá nə nə swìn də, nə ba cuna tun, ku yi nə  
 biri də, ɔ yi kunkunu, ɔ sugu tə ga tɛ́lé nə waa.

## 2

*Zwezi nə wá zigi nə jirimv Yu yáá con*  
*(Zwan 13.34-35; 14.21-24; 15.12-14)*

<sup>1</sup> À bísíná-ba, à púpúní tə yìèn tə mama á nə, sə á dānā ká fwa cuna. Yá liù nə cùgò, nə jə liù, ɔ wá zigi nə jirimv, ku yoo tə wa. Ku tíú wulə nyina Yu səpuni nə. Ku liù tə nə yi Zwezi-\*Kərisə. Yá ɔ mù dān nə yi cígá tíú. <sup>2</sup> Ʋ mù tətə nə tiga ndə nə yuu \*jonj vani ba nə gua, sə ku sin nə cuna tə. Ku tà nə mù cici cuna tə ka li yiri, ku yi lià tə də mama cuna yiri.

<sup>3</sup> Won tə nə biri nəba, də nə yèé Yu, ku yi, də nə nə zílí ɔ nii yìèn tə. <sup>4</sup> Liù nə wú, ɔ yèé Yu, ɔ ga ba ɔ nii yìèn tə zílí, ku tíú yi kunkunu, cígá ga tɛ́lé ku tíú con. <sup>5</sup> Liù tə, ɔ nə jin ɔ sugu ɔ bican wa, Yu sonu tə cígá súde wá. Ku nətɔ tə biri də, nə mù də Yu vwə duən nə. <sup>6</sup> Liù tə, ɔ nə swìn də, ɔ wá vwə ɔ tìàn, Yu yira máná mama wuuu, ku tíú mɛ, sə ɔ ya ndə Zwezi nə yi nətɔ.

*Ka sóní duən yoo*

<sup>7</sup> À nubisoni-ba, ku tə, à nə púpúní á nə, ku tà \*nii yoo nədɔn yoo. Ku nii tɛ́ntə, à nə púpúní ku yoo á nə, yi nədwan. Ku nii yoo tə yin də aba, ku jju mama. Ku mù nə yi sugu nədwan tə, á nə nì. <sup>8</sup> Nii nədwan tə yoo, à nə púpúní, à pa aba tə, ku nii yoo tə yi nədɔn də. Ku twá Zwezi də aba, ku ma biri ku tìàn də, ku yi cígá. Yikunu

vii, nə ga manwarı nə na poni, ku pıplı. <sup>9</sup> Də liù nə swın də, v wulə poni wa, ku tíú ga ba v don tə, v nə yı v nubiu \*Kərisə yıri, swə, v mù liù təntə tə wà yikunu wa nan. <sup>10</sup> Liù tə, v nə swə v don, v nə yı v nubiu Kərisə yıri, ku tíú tə wulə poni wa, máŋá mama wuuu. Yá won ga tələ v waa con, ku nə wá pa v dɔgv Yı cwəŋə tə. <sup>11</sup> Yá liù tə, v dān nə ba v don, v nə yı v nubiu Kərisə yıri, swə, ku tíú tə wulə yikunu wa, v ga vələ tə wa. V yèrì bwálí tə, v nə vələ, yikunu tə nə púé v yía nə yıri.

*(Romə tíán 12.2; Zwakə 4.4; Matíə 6.24)*

<sup>12</sup> À bisíná-ba, à púpúní á nə, sə à swın á con də, Yı twá Zwezi yıri tə nə, v ma sèe v kwen á cuna tə, v li á mù də wá pwərə wa. <sup>13</sup> À nyına-ba, à púpúní á nə, á nə yèé liù\* tə, v nə yın lá, luv jju mama wa yıri. À púpúní á nə, balandɔra-ba, á nə dí dīàn \*Sıtana tə yuu wa yıri. <sup>14</sup> À bisíná-ba, à púpúní á nə, á nə yèé á nyına Yı tə yıri. À nyına-ba, à púpúní á nə, á nə yèé liù tə, v nə yın lá luv jju mama wa yıri. Balandɔra-ba, à púpúní á nə, á nə dà, yá Yı sɔgv tə ga wulə á waa, máŋá mama wuuu tə yıri. Ku súrí lá, á dí dīàn Sıtana tə yuu wa. <sup>15</sup> Á dānà ká sóní luv yìèn tə, nə à yèé ku wa wièn tə. Liù nə swə wièn tə nə wulə luv ku tə wa, ku tíú ba nyına Yı swə. <sup>16</sup> Á nəŋə wièn tə mama, tə nə wulə luv wa: Tə mù nə yı, ləzwənə pùé yokɔkwınan fıra, də v yía ka zv lià wièn, də v wojan fwıə. Tə wièn təntə wà nyına Yı con nan, tə yı tə wulə luv ku

\* **2:13** 2.13 Ku yı Zwezi yoo nə ku swın.

tə wa. <sup>17</sup> Á lwara də, lʊ də kʊ yokukwɪnan fɪra tə wulə tə kɛɛn. Yá liù tə, ʊ dàń nə fwa Yɪ fɪra, kʊ tíú wulə mɪ wa, kʊ nə ba zwèe ʊ con.

*(1 Zwan 4.1-6; 2 Zwan 7-11; Zwan 16.13-15)*

<sup>18</sup> À bisíná-ba, lʊ zaŋʊ máŋá bwələ. Á nì də, ba swɪn də, Zwezi-\*Kərisə dɔŋɔ wá bà. Yá síún nə, Zwezi-Kərisə dɔŋa dáá, ba nə wulə. Kʊ nɛtʊ tə pɪn, nə lwarɪ də, kʊ yɪ lʊ zaŋʊ máŋá nə bwələ. <sup>19</sup> Zwezi-Kərisə dɔŋa tə nan nə tətəŋi wa. Yá ba dàń yà tà nə wa lià fuɛn. Də ba yà nə yɪ nə wa lià, ba yà bá nan ba yá nəba. Kʊ nɛtʊ tə fwa, sə kʊ ma bɪrɪ də, ba mama yà tà nə wa lià. <sup>20</sup> Yá á mù jon Yɪ-\*Siŋu tə. Kʊ yɪ Zwezi-Kərisə nə pɪn kʊ aba. Mə kʊ mù nə pɪn, á mù mama yèé cígá tə. <sup>21</sup> Kʊ tà à púpúní á nə, sə à swɪn də, á yèrì cígá tə. Kʊ yɪ à púpúní, sə à bɪrɪ də, á yèé ka. Á dàń mɛ, sə á yəni də, kunkʊn nədʊ də ba cígá tə con naŋa. <sup>22</sup> Wàà nə yɪ kunkʊnʊ? Kʊ yɪ liù tə, ʊ nə swɪn də, Zwezi tà Kərisə. ʊ mù nə yɪ Zwezi-Kərisə dɔŋɔ. ʊ mù nə vɪ nyɪna Yɪ də ʊ biú tə mama bələ. <sup>23</sup> Liù tə, ʊ nə vɪga biú tə, kʊ tíú tə vɪga nyɪna tə də. Liù tə, ʊ nə sèe biú tə, kʊ tíú tə sèe nyɪna tə də. <sup>24</sup> Á zɪga yoo tə yuu wa, á nə nì kʊ dɛn laŋʊ wa. Á nə zɪga kʊ tə yuu wa, á nə nì máŋá tə wa, kʊ nə tɔn, kʊ bɪrɪ də, á wá vwə á tiàn nyɪna Yɪ də ʊ biú Zwezi yɪra máŋá mama wuu. <sup>25</sup> Yá á nəŋə, biú tə kàn nii də, ʊ wá pa nəba mɪ tə, kʊ nə ba zwèe Yɪ con.

<sup>26</sup> À púpúní tə yìèn tə, à pa aba, lià tə yɪrɪ, ba nə wulə ba gɪgɪrɪ aba. <sup>27</sup> Á mù con nə, Kərisə pɪn aba Yɪ-Siŋu tə. Kʊ súé aba, yá á kùè ba liù

don kàrà pìà. U Siṅu tɛ cígá kàrà aba yìèn tɛ mama, yuu wa. Tɛ tɛ yuu wa, ku nè kàrì aba, tɛ yi cígá, tɛ tà kunkun. Ku mù nè pɪn, á twá kàrà tɛ nii nè, ɔ Siṅu tɛ nè bɪrɪ aba. Yá á ga wulə də Zwezi-Kərisə mánǵá mama wuuu.

*(Zwan 1.12-13; Romə tiàn 8.14-19; 1 Zwan 5.18)*

<sup>28</sup> À bisíná-ba, ku mù tɛ yɪrɪ, á vwə á tiàn Zwezi-Kərisə yɪra mánǵá mama wuuu. Ku mù nè wá pa dɪn tɛ, ɔ nè wá pií ɔ bà, sə nè zən nè yəni də, fən tɛlɛ, cavɪra də dən ká ja nəba ɔ yáá con. <sup>29</sup> Á yèé də, Yɪ yi cígá tíú. Á dǎn mɛ, sə á yəni də, liù tɛ, ɔ nè tɪŋa də cígá, yi ɔ biú.

### 3

#### *Lìà tɛ, ba nè yi Yɪ bia yoo*

<sup>1</sup> Á nəŋə tɛ nè, nyɪna Yɪ nè sóní nəba zənzən nətu. U sonu tɛ pɪn, ɔ boŋə nəba ɔ bia. Yá nè cígá ga yi Yɪ bia də. Lìà tɛ, lɔb nè tɪ ba, wà Yɪ yəni. Ku mù nè pɪn, ba yèrì nè də. <sup>2</sup> À nubisoni-ba, síún nè, nè dǎn yi Yɪ bia. Yá won tɛ, nè nè wá yà, Yɪ tɛ wà ku bɪrɪ. Nə dǎn nè yèé də, Zwezi-\*Kərisə nè wá pií ɔ bà, mánǵá tɛ wa, nè wá na nətu tɛ, ɔ nè yi. Yá nè wá lwǎn, nè jì ndə ɔ nè. <sup>3</sup> Liù tɛ mama, ɔ nè jə yala tɛntə Zwezi-Kərisə con, ku tíú yáá kə dǎn, sə ɔ kwɛn ɔ bɪcan, sə ku ya nəpon Yɪ yáá con. Yá ɔ dǎn wá yà ndə Zwezi-Kərisə tətə nè, ɔ bɪcan nè yi nəpon Yɪ yáá con.

#### *Cvna liù ba Yɪ nii yìèn zìlì*

<sup>4</sup> Liù tè mama, v nè tɔŋa cɔna, ku tíú vɪga Yɪ \*nii. Ku dǎn pìà ku bɪrɪ dɛ, cɔna yɪ ka vɪ Yɪ nii ziló. <sup>5</sup> Á yèó dɛ, Zwezi-\*Kərisə twi tɪa yuu wa, sɛ v lɪ là cɔna. Yá v tətə yuu ba cɔna jə. <sup>6</sup> Liù tè mama, v dɛ wá dǎn nè vwə duən nè, máŋá mama wuuu, kúv ba cɔna fwa. Yá liù tè v nè tɔŋa cɔna, ku tíú tè wà wá nɪ, v ga yèrɪ wá dɛ.

<sup>7</sup> À bìsíná-ba, á dǎnà ká pa liù mama gɪgɪrɪ aba. Liù tè, v nè tɔŋa dɛ cígá, ku tíú yɪ cígá tíú, ndə Zwezi-Kərisə tətə nè yɪ cígá tíú nɛv. <sup>8</sup> \*Sɪtana nè tɔŋa cɔna, ku jɪv mama. Ku mù nè pɪn, liù tè, v nè tɔŋa cɔna v yɪ Sɪtana nè tɪ. Yɪ-Biu Zwezi-Kərisə twi tɪa yuu wa, sɛ v cùgò Sɪtana tutɔnan tè mama.

<sup>9</sup> Liù tè mama, v dǎn nè ya Yɪ bìú, v jə Yɪ mu tè. V ga ba cɔna tɔŋa. Yɪ dǎn nè yɪ v nyɪna. Ku mù nè pɪn, v wàrɪ cɔna v tɔŋa. <sup>10</sup> Mə ku twá nɛv, ba ma lwarɪ Yɪ bia tè dɛ Sɪtana bia tè swíán duən wa. Liù tè mama, v nè ba tɔŋa dɛ cígá, ku tíú tà Yɪ bìú. Liù tè dɛ, v nè ba v don, v nè yɪ v nubiu Kərisə yɪrɪ, swə, v dɛ tà Yɪ bìú.

*Nii sonu dɛ bɪcan sonu yoo*

*(Zwan 15.12-21; 1 Zwan 4.7-8, 16-21)*

<sup>11</sup> Ku tè, ba nè swɪn, ba pa á nì, ku jɪv mama, ku mù nè yɪ, sɛ nè sóní duən. <sup>12</sup> Nə wà mɛ, sɛ nè ya ndə Kayen nè. V mù yà yɪ \*Sɪtana nè tɪ. Kayen gva v nyánú. Yá bɛɛɛ nè pɪn, v ma gu v nyánú tè? Ku yɪ v mù Kayen tutɔnan yà yɪ tutɔnkunkwɪnan, yá v nyánú tè tutɔnan ga zɪən. Ku mù nè pɪn, v ma gu wá. <sup>13</sup> À nubɪa-ba, á dǎnà ká pa ku dɪ á yuu dɛ là tè, lɔv nè tɪ ba nè duŋa aba. <sup>14</sup> Nə swə nè duən tè, ba nè yɪ nè

nubia \*Kërisë yiri. Ku mù nè pɪn, nè yèé dë, nè nan tian wa, nè zu mi wa, ku nè ba zwèe Yu con. Liù tē, v nè ba v don, v nè yi v nubiu Kërisë yiri, swə, ku tíú tē wulə tian wa, tē nè ba zwèe. <sup>15</sup> Liù tē mama, v nè duŋa v don, v nè yi v nubiu Kërisë yiri, ku tíú yi lagɔrv. Yá á ga yèé dë, lagɔrv nɛdɔ tətə ba mi tē, ku nè ba zwèe Yu con, tē jə, v pa v tiàn nè. <sup>16</sup> Zwezi-Kërisë nè ti v mi, v ma lárí nè yuu nè. Yá ku dàń twá dë v mù, nè lwarɪ won tē, ku nè yi sonu tē. Nə dë dàń mɛ, sə nè ti nè mi tē, nè ma lárí nè duən tē, ba nè yi nè nubia Kërisë yiri, yuu nè. <sup>17</sup> Ku wáá ku pɪn jɪjə tíú don ni v don, v nè yi v nubiu Kërisë yiri, yojanv wa, v ga vɪ, sə v san wá. Nətə nè ba wáá ba swɪn dë, Yu sonu tē wulə jɪjə tíú tɛntə bɪcan wa?

<sup>18</sup> À bisíná-ba, nè sonu tē mɛ, sə ku ya cígá cígá sonu, ba nè na ku, nè tɔtɔnan wa. Nə dàná ká ja nii sonu tē, ku nè swɪn sùràn tē nè ywán cíci. <sup>19</sup> Mə nətɔ, nè nè wá twá nè ma lwarɪ dë, nè yi cígá tiàn. Yá mə nətɔ, nè nè wá twá, nè ma ja bɪcan sié Yu yáá con. <sup>20</sup> Nə yèé dë, Yu dwə nè pubɔŋa tē, v ga yèé won mama. Ku mù nè yi, dë nè nè caga nè tiàn nii nè nè bɪcan wa, ku ba dèń jə.

<sup>21</sup> À nubisoni-ba, dë nè dàń nè ba nè tiàn nii nè caga nè bɪcan wa, nè wá zən nè yəni dë, fən təlɛ Yu yáá con. <sup>22</sup> Nə zílí Yu nii yìèn tē, yá nè ga tɔŋa ku tē, v nè swə. Ku mù nè pɪn, won tē mama nè nè lòrì v con, v wá pa ku nèba. <sup>23</sup> Á nɛŋə, ku tē nè yi v nii yoo tē. Ku mù nè yi, sə nè kə nè waa v biú Zwezi-Kërisë nè. Yá nè ga sóní



duən, ndə Kərisə nə pɪn nəba nii kv yoo təntə yuu wa nətv. <sup>24</sup> Liù tə, v nə zìlí Yui nii yìèn tə, kv tíú vwə v tìàn Yui yira, mánǎ mama wuuu, Yui də ga wulə də wá mánǎ mama wuuu. Yá kv twá də Yui-\*Siŋu tə, v nə pɪn nəba, nə yèé də, Yui wulə də nəba, mánǎ mama wuuu.

## 4

### *Yui-Siŋu tə də kunkvna yoo* (1 Zwan 2.18-27; 2 Zwan 7-11)

<sup>1</sup> À nubisoni-ba, á dànà ká kə á waa là tə mama nə, ba nə swìn də, ba súé də Yui-\*Siŋu tə. Síún nə, kunkvñ sùsùnà súé luv wa. Á me, sə á dí yáá, á mìn ba á lwarɪ də, Siŋu tə, ba nə jə, nə ya Yui-Siŋu tə. <sup>2</sup> Á nəŋə nətv tə, á nə wá twá, á ma lwarɪ də, kv nə ya Yui-Siŋu tə. Liù tə mama, v nə swìn v bɪrɪ də, Zwezi-\*Kərisə cígá nan Yui con, v bà, v pa, kan lɪrɪ wá tɪa yuu wa, kv tíú yɪ Yui nə tɪ wá. <sup>3</sup> Liù tə mama, v nə ba cígá tə bɪrɪ Zwezi-Kərisə yoo təntə yuu wa, kv tíú tà Yui nə tɪ wá. Kv tíú súé də Kərisə dɪŋv tə siŋu tə. Á dí yáá á nì də, Kərisə dɪŋv təntə wá bà. Síún nə, v manwarɪ v wulə luv wa.

<sup>4</sup> À bisíná-ba, á mù yɪ Yui nə tɪ aba. Yui-Siŋu tə, kv nə súé aba, kv dìn dwə siŋu tə, kv nə wulə là tə con, luv nə tɪ ba. Kv mù nə pɪn, á dí dìn kunkvñ sùsùnà tə yuu wa. <sup>5</sup> Ba mù yɪ luv nə tɪ ba. Kv mù nə pɪn, ba swìn tə tə, là tə luv nə tɪ ba, nə swìn. Kv mù yɪrɪ nə là təntə cuga ba sùràn tə. <sup>6</sup> Nə mù ya Yui nə tɪ nəba. Liù tə, v nə yèé Yui, v yáá cugv nə sugv. Yá liù tə, v nə tà

Yü nә ti wá, v ba nә sɔgv cɔga. Mә kv twá nәtv, nә ma lwarı sinju tә, kv nә yi cígá, dә kunkun sinju tә swíán duән wa.

*Sóni Yü, sә n sóni n duән*

*(1 Zwan 3.11-24; Zwan 3.16-17; Romә tìán 5.5-8)*

<sup>7</sup> À nubisoni-ba, sonu yi kv nan Yü con. Kv mù nә pın, nә swéné duән. Liù tә mama, v nә jә sonu, v ya Yü biú, yá v ga yèé Yü dә. <sup>8</sup> Yü ya sonu Yü. Liù tә, v nә ba sonu jә, v wà Yü lwarı.

<sup>9</sup> Á nәjә nәtv tә, Yü nә twá, v ma bırı v sonu tә nәba. U tun v bidva kәlән tә tia yuu wa, sә nә twá dә wá, nә na mu tә, kv nә ba zwèe v con.

<sup>10</sup> Á nәjә nәtv tә, v sonu tә nә yi. Kv tà, nә nә sóni Yü tә yırı, kv ya, v nә swә nәba tә yırı. Yá v dàń tun v biú tә, sә v ti, ndә nә yuu \*jonji vanı nә, ba nә gva, sә kv li nә cuna tә.

<sup>11</sup> À nubisoni-ba, dә Yü nә sóni nәba sonu tәntә yiri, nә dә dàń mә, sә nә sóni duән. <sup>12</sup> Liù mama tә wà Yü ni. Dә nә nә swә duән, Yü wulә dә nәba, máńá mama wuuu, yá v sonu tә súé nәba cígá cígá.

<sup>13</sup> Yü pın nәba v Sinju tә. Kv mù nә pın, nә yèé dә, nә vwә nә tìán Yü yıra, máńá mama wuuu. Yü dә ga vwә nәba, máńá mama wuuu. <sup>14</sup> Yá nә mù dàń ni, nә ga swìn nә bırı dә, nyına Yü tun v biú Zwezi tә tia yuu wa, sә v jon læzoni ba cuna wa. <sup>15</sup> Liù tә, v nә swìn, v bırı dә, Zwezi ya Yü-Biu, Yü wulә dә kv tíú, máńá mama wuuu, v dә ga wulә dә Yü, máńá mama wuuu. <sup>16</sup> Nә mù yèé sonu tә, Yü nә swә nәba. Yá nә pın cígá kv yoo tә nә dә. Yü ya sonu Yü. Liù tә, v nә

jə sonu, ʋ wulə də Yɪ mánǎ mama wuuu. Yɪ də ga wulə də wá, mánǎ mama wuuu. <sup>17</sup> Də nə nə súé də sonu cígá cígá, ndə ku nə me nətu, ku mù nə wá pa, nə zən nə yəni də, fən təlɛ dɪn tə nə, Zwezi nə wá pìi ʋ bà, sə ʋ bɔ̀rì bɔ̀rà tə. Nətu tə, Zwezi dǎn nə yɪ, mə nətu nə də yɪ lɔʋ wa. <sup>18</sup> Sonu wa ba fən jə. Ku mù nə pɪn, liù tə, fən nə jə, ʋ wà swí də sonu. Liù nə yèé də, càn biàn ʋ yuu wa, ku mù nə yàá pa fən jə wá. Ku mù nə pɪn, liù tə fən nə jə, ʋ ba cígá cígá sonu jə.

<sup>19</sup> Yɪ nə dí yáá ʋ sóní nəba. Ku mù nə pɪn, nə mù jə sonu tə. <sup>20</sup> Də liù nə swìn də, ʋ swə Yɪ, ʋ ga dɔ̀ŋa ʋ don, ʋ nə yɪ ʋ nubiu Kərisə yɪɪ, ku tíu yɪ kɔ̀nkɔ̀nu. Də ʋ nə ba ʋ nubiu tə swə, ʋ ga na wá ʋ yíá wa, ʋ wà̀rì Yɪ tə, ʋ nə ba na ʋ yíá wa, ʋ sóní. <sup>21</sup> Á nəŋə yoo tə, Yɪ nə pɪn nəba ʋ nii tə ku yuu wa. Liù tə, ʋ nə swə Yɪ, ʋ me, sə ʋ sóní ʋ nubiu də.

## 5

*Kərisə lià dí diàn lɔʋ wiən yuu wa  
(2 Zwan 5-6; Zwan 1.29-34; 3.36; 20.31)*

<sup>1</sup> Liù tə mama, ʋ nə pɪn cígá də, Zwezi nə yɪ \*Kərisə, ku tíu ya Yɪ biú. Yá liù tə mama, ʋ nə swə ʋ nyɪna Yɪ, ʋ swə ʋ bia tə də. <sup>2</sup> Á nəŋə nətu, nə nə wá twá nə lwarɪ də, nə swə Yɪ bia tə. Ku mù nə yɪ, nə nə swə Yɪ, yá nə ga zílí ʋ nii yìèn tə.

<sup>3</sup> Á nəŋə, ku tə nə bɪɪ də, nə swə Yɪ. Ku mù nə yɪ, nə nə zílí Yɪ nii yìèn tə. Yá Yɪ nii yìèn tə ka zílí ga ba cà.

<sup>4</sup> Liù tə mama, v nə ya Yü biú dí diàn, luv yìèn yuu wa. Á nəŋə nətv tə, nə nə dí diàn luv yìèn yuu wa. Kuv m̀ nə yí nə waa tə, nə nə ken Yü nə. <sup>5</sup> Liù tələ, v nə dí diàn luv yìèn yuu wa, də kuv nə tà liù tə, v nə pín cígá də, Zwezi ya Yü-Biu.

### *Yìèn tə, tə nə biri də, Zwezi yí Yü-Biu*

<sup>6</sup> Zwezi nə ya liù tə, v nə twi də níá\* də jana. Kuv tà níá cici nə, v ja bà. Kuv yí níá də jana nə, v ja bà. Yü-\*Siŋu tə nə pín, ba lwarí də, kuv yoo təntə yí cígá, Yü-Siŋu tə swìn cígá. <sup>7</sup> Wiən batwa nə biri kuv yoo təntə. <sup>8</sup> Kuv m̀ nə yí Yü-Siŋu tə, də níá tə, də jana tə. Yá tə wiən batwa tə me yí yoo nədv təntə nə tə biri.

<sup>9</sup> Liù nə swìn yoo v biri nəba, nə yàá jon kuv. Yá Yü nə swìn yoo v biri, kuv m̀ nə dwə. Á nəŋə kuv tə, Yü nə swìn v biri v biú tə yoo yuu wa. <sup>10</sup> Liù tə, v nə ken v waa Yü-Biu tə nə wuuu, v jə Yü s̀ràn təntə v waa con. Liù tə, v nə wà v waa ken Yü-Biu tə nə, v ja Yü v ma jì kunkuv, v nə wà cígá pín Yü s̀ràn tə nə, v nə swìn v biú tə yoo yuu wa yiri. <sup>11</sup> Á nəŋə, tə s̀ràn təntə nə: Yü pín nəba mu tə, kuv nə ba zwèe v con. Yá v biú tə dān nə yí mu təntə dəkuu. <sup>12</sup> Liù tə, Yü-Biu tə nə wulə də wá, kuv tíú tə jə mu təntə. Liù tə, Yü-Biu tə nə tələ də wá, kuv tíú ba mu təntə jə.

---

\* **5:6** 5.6 Níá tə yí, ka lə Zwezi níá wa yoo nə, kuv biri. Jana tə yí, Zwezi tian tə yoo nə, kuv biri.

<sup>13</sup> À púpúní sagi ku tē, à pɪn aba, sē á lwarɪ yoo ku tē. Ku mù nē yɪ, á nē keni á waa Yɪ-Biu tē nē wuuu, á jē mi tē, ku nē ba zwèe Yɪ con.

*(Zwan 15.7; Marəkə 11.24; 1 Zwan 3.6-9)*

<sup>14</sup> Yá á nēṅə nētɪ tē, nē nē zən nē yəni dē, fən təlɛ́ Yɪ yáá con. Dē nē nē lòrì won, ku twá dē v fira tē, v cuga nēba. <sup>15</sup> Dē nē dān nē yèé dē, v cuga nēba won tē mama, nē nē lòrì v con, nē yèé dē, v wá pa ku nēba dē.

<sup>16</sup> Dē liù nē nɪ v don, v nē yɪ v nubiu \*Kərisə yɪrɪ, dē v tɪŋa cɪna, tē nē bá ja wá tē va tɪan wa, sē v jɪn Yɪ. Yá Yɪ wá pa mi v don tēntē nē, v nē yɪ v nubiu Kərisə yɪrɪ. Ku nētɪ tē jē nywarɪ, ku pa lià tē nē, ba cɪna tē nē bá kə ba tɪan wa. Yá cɪna duən dān nē wulə tē yígúré nē yɪ tɪan. Ku tà cɪna yiri tēntē yɪrɪ nē, à swìn á con, sē á jɪn Yɪ. <sup>17</sup> Tutɪnyiri mama ku nē yɪ kɪnkɪn yoo, ku ya cɪna. Yá cɪna duən wulə, tē nē ba liù tɪan wa kəni.

<sup>18</sup> Nē yèé dē, liù tē mama, v nē ya Yɪ biú, Yɪ-Biu Zwezi nē cì v nē, v kúú ba cɪna tɪŋa. Ku mù nē pɪn, \*Sɪtana wàrì won mama, v fwa v yira. <sup>19</sup> Nē yèé dē, nē ya Yɪ nē tɪ. Yá Sɪtana nē dí diàn lià tē mama yuu wa, ba nē yɪ lɒv nē tɪ ba.

<sup>20</sup> Nē yèé dē, Yɪ-Biu Zwezi twi, v ga pa nēba wɒbɒŋa, sē nē lwarɪ Yɪ tē, v nē yɪ cígá cígá Yɪ. Ku twá dē v biú Zwezi-Kərisə, nē dān wulə, dē v mù cígá cígá Yɪ. V mù nē yɪ cígá cígá Yɪ, v nē pɪn mi tē, ku nē ba zwèe.

<sup>21</sup> À bìsíná-ba, á cia á tiàn nē dē wɒŋwanan tē.

**Yu soywánó sagı**  
**Nuni, Southern: Yu soywánó sagı New Testament**  
**Le Nouveau Testament en Nun**

copyright © 1999 Wycliffe Bible Translators, Inc.

Language: Nuni, Southern

Contributor: Wycliffe Bible Translators, Inc.

All rights reserved.

2020-11-30

---

PDF generated using Haiola and XeLaTeX on 21 Feb 2024 from source  
files dated 29 Jan 2022

d18530a7-7259-5f23-92b6-70e3abe5f3fa